

18/11/1998

Shipley yakin perbicaraan Anwar adil

PERDANA Menteri New Zealand, Jenny Shipley, yakin bekas Timbalan Perdana Menteri, Datuk Seri Anwar Ibrahim, akan diberi perbicaraan yang adil.

Menurutnya, keyakinan itu berdasarkan jaminan Datuk Seri Dr Mahathir Mohamad berhubung perkara itu.

"Jaminan itu jelas membuktikan kesungguhan Kerajaan Malaysia dalam memastikan Anwar mendapat keadilan dalam perbicaraan di mahkamah.

"Jelas ada komitmen penuh daripada Kerajaan Malaysia berhubung perkara ini," katanya kepada pemberita selepas pertemuan dua hala dengan Dr Mahathir, semalam.

Isu Anwar sebelum ini mendapat perhatian New Zealand sehingga Shipley membangkitkan isu itu pada pertemuannya dengan Dr Mahathir.

Sebelum ini, Shipley dikatakan meragui Anwar akan diberi perbicaraan yang adil di sini.

Sementara itu, Menteri Luar, Datuk Seri Abdullah Ahmad Badawi berkata, pada pertemuan itu kedua-dua pemimpin turut membincangkan mengenai krisis kewangan yang berlaku di rantau ini.

"New Zealand bersetuju dengan Dr Mahathir bahawa krisis kewangan harus diberi perhatian serius pada Sidang Kemuncak Apec.

"Perkara ini penting dalam usaha mencari jalan penyelesaian kerana tanpa penyelesaian adalah sukar untuk memulihkan keadaan ekonomi," katanya.

Menurutnya, New Zealand sependapat masalah itu berpunca daripada aliran tunai jangka pendek, yang mendedahkannya kepada risiko spekulasi.

(END)